

*E P I S T O L A*

A D

DOMINICUM ALFENUM VARIUM

I. C.





J. ANDREAS SERRAUS

DOMINICO ALFENO VARIO I. C.

S. P. D.

**L**Egi perlibenter, mi Vari, doctissimum tuum Commentarium ad Federici Imp. Constitutionem, quæ incipit, *Prædecessorum nostrorum*: in quo cum tui in me mirifici amoris monumentum extare voluisti; tum vero illud me valde delectavit, quod in totius legis præcipua sententia eruenda, tua ratio a mea minime discreparet. Tecum enim convenit mihi, vitiatam omnino fuisse Federici Constitutionem, eamque tandem, ad antiquissimi codicis fidem, saniori, meliorique suæ lectioni esse restitutam. Quod profecto quum ad germanam legis sententiam desumendam maxime pertinere existimassem; id ipsum tu, me quidem libente, peræque multis confirmas. Unum vero est, in quo meam interpretationem minus probare profiteris. Scilicet priora illa verba *Prædecessorum nostrorum* aliorsum, atque ego, alique acceperamus, accipienda arbitraris. Quod tu quum antea mihi narrasses, Federici nempe prædecessores illos te alios omnino, quam Siculos Reges fuisse, existimare; in eo te a nobis dissentire, in re præsertim haud magni

A 2

pon-

ponderis, parum referre putavi: ac facile patiebar, te, Virum harum rerum scientissimum, alia adinvenisse monumenta, quæ rem exploratiorem facerent. Attamen postquam ad eum locum veni, dum sapius tuas conjecturas expendo, exquisitam quidem bonarum rerum copiam inveni: verum nihil, fateor, tanti ibi esse mihi visum est, quare in pristina illa mea sententia non perseverarem. Et quoniam res nonnihil etiam ad Alfonsum Airoidum pertinere videtur, ad eum quum perrexissem, e vestigio cum ipso totum Commentarium tuum perlegimus, perpendimusque universa, quæ affers argumenta. Quid censes? Nihilo minus, quam antea, certum apud nos, fixumque mansit, non alios prædecessores illos, quam quales in Patricianis adnotationibus indicaveram, hoc est Normannos Reges nostros, Rogerium, & Guilelmum fuisse. Quam ad rem Airoidus (nosti enim quanta sit in eo amplissimo Viro cum singulari virtute rerum præstantissimarum scientia) tot in præsentia mihi recitavit monumenta; ut nullam amplius res habitura esse difficultatem videretur. Quare non fuit mihi diutius dubitandum, quin statim ad te hoc litterarum scriberem, non tam refellendi tui causa, quam ea, quæ nobis venerunt in mentem, significandi: ut, quanquam in disputatione hac tecum mihi rem futuram videam, quippe alia mihi, quam tibi sententia probetur; inde tamen

5  
tamen nullam nostræ amicitiae conjunctionis-  
que orituram distractionem ; quin po-  
tius , ea integra manente , id ipsum ad  
historiam illustrandam, fortasse non inutile  
futurum existimem .

Totius igitur sententiae tuæ ratio &  
summa hæc est . Non videri verisimile ,  
Rogerium Comitem Normannum eam le-  
gem promulgasse , cujus insignia extant li-  
beralitatis in Ecclesiam monumenta , ut  
partem etiam omnium suarum opum ter-  
tiam eidem , de Rom. Pontificis sententia,  
attribueret : nec aliter cogitandum de cete-  
ris , qui secuti sunt , Normannis Principi-  
bus . Ergo *Prædecessores* illos alibi perqui-  
rendos , apud Byzantinos scilicet Imp. , qui,  
quoniam & ætate Federicum præcessere ,  
& , dum Siciliae Regnum tenere , leges  
ejusmodi ediderunt ; ad hos potius , quam  
alios prædecessores suos respexisse Fede-  
ricum . Suspecti autem postulari posse di-  
ploma Manfredi Regis : atque ignorantiae  
arguendum Gualterium de Odra Cancellar-  
ium . Ante vero Federicum nunquam in  
Sicilia latam fuisse ea de re legem : & quæ  
in Federici Responsione ad Pontificis po-  
stulata leguntur verba , *Secundum formam  
antiquæ Constitutionis Regni Siciliae* , ea  
mendosa esse , & pro *antiquæ* , legendum  
*antea datæ* .

Hæc fere summa est tuarum rationum ,  
quæ ad tuam confirmandam opinionem  
facere visæ sunt . Ad quæ singula ante-

quam ordine aggrediar, res postulat, ut tibi totius instituti mei rationem planius exponam. Ego, Vari doctissime, quum eo devenissem, ut Federici Constitutionem, pro injuncti mihi muneris ratione, interpretarer, nihil prius mihi faciendum putavi, quam Stephanum Patritium amplissimum Regium Consiliarium, ejus ipsius Consultationis auctorem, consulere, eo certe consilio ac spe, ut ab illo, pro ipsius singulari doctrina, quod maxime mea interesset, perdiscerem. Ac re in utramque partem perpensa, in eo tandem prorsus convenimus, non ab aliis, quam a Normannis Regibus suam Federicum repetiisse Constitutionem. Additoque insuper Viri præstantissimi Alfonsi Airoidi suffragio, ac prolatis, quæ idem nobis suppeditavit, monumentis, rem fatis exploratam fecisse existimavimus, ut plura desiderari non arbitraremur. Sic enim nostræ interpretationis rationem instituimus.

Quum Federicus Imp. veterem suorum prædecessorum Constitutionem, quam turbatio præteriti temporis antiquarat, instaurare professus est; non quoslibet suos prædecessores, nec vaga illorum nomina usurpasse, sed certos prædecessores, certosque ejus Constitutionis auctores respexisse oportuit. Nihil enim tam alienum a Principe legis conditore, quam verba illa effari sine certa causa. Quare, si vocabuli ipsius vim sequamur, quod hoc loco absurdum

surdum non videtur , prædecessores ob id  
 Federicus appellare poterat , vel quod ge-  
 neris familiæque necessitudine aliqua eos  
 attingeret ; vel quod Principatus ac dignita-  
 tis jus ab iisdem desumpsisset : nam qua alia  
 de causa eos prædecessores suos vocare  
 potuerit , non video . Utro autem ex his  
 Græci Principes Federico proxime præ-  
 cessere ? Neutro profecto dabis . Nul-  
 lum quippe jus Principatus Federicus a  
 Græcis repetebat . Regnum enim a Nor-  
 mannis acceperat : Normanni autem , sive  
 belli , sive sanguinis jure , Benevento , Sa-  
 lerno , Capua , quarum urbium Principatum  
 Longobardi tenebant , potiti , Siciliaque Sa-  
 racenis erepta , plurimas has provincias in  
 unum veluti corpus redegerunt , Regnumque  
 in Italia instaurarunt . Quod si nonnullas  
 Normanni ditiones Græcis eripuerunt , velu-  
 ti in Calabria , Apuliaque ; Imperium il-  
 lud Italicum Græcorum , ubi Ducatum  
 Beneventanum qua late patebat , non qua  
 Caroli Magni , Pipini , Ludovicique temporibus ,  
 sed qua recentiorum Occidentalium ,  
 Othonum nempe , & Henrici I , ac II ju-  
 ra ferebantur , demas , tam angustis limiti-  
 bus contineri comperies , ut ex eo præ-  
 decessores suos Federicus accipere , nisi per  
 contemptum , non posset . Quod si his  
 addideris , quod Normanni præseferbant ,  
 quidquid unquam adepti fuerant , id acce-  
 ptum potius retulisse juribus Italicis , quam  
 Byzantinis ; prædecessoris nomen evanescit :

nunquam enim universæ Normannicæ stirpis Principes , ut prædecessores suos Græcos Imperatores agnovere : Nullam autem Federicum necessitudinem , sanguinisque conjunctionem cum Imperatoribus Græcis habuisse , nihil attinet demonstrare , quum id cuique exploratum existimem . Quoniam igitur nulla satis probabili causa Byzantinos Federicus prædecessores suos accipere poterat ; quis vel primo obtutu non videt , prædecessores illos nunquam congruentius , aut melius intelligi , quam si ad eos referantur Principes , qui has nostras Italicas Provincias confociarunt , legesque eis , & Regni formam dedere ? Prædecessores videlicet illos jure suos vocavit Federicus , a quibus cum genus duxerat , tum Regium jus acceperat . Et re quidem vera quotiescumque prædecessorum nomen usurpatur ( usurpatur autem sæpius tam in Constitutionibus , quam in aliis diplomatibus ) ad Græcos quidem Imperatores omnino nunquam ; constanter vero ad Normannos Principes trahi semper illi possunt . Ita prorsus in Constit. lib. III tit. IV descriptum legimus : *Quod qui de prædictis tenuerint aliquid , de quo non habeant privilegium Divorum Regum Rogerii , & Guilielmi I , aut II , Prædecessorum nostrorum .* Ita pariter ib. lib. I tit. XLVII : ubi agitur *de servando honorem Comitibus , Barcnibus , & Militibus* , nempe de rebus feudalibus , lites statuitur dijudicandas *Se-*

*cun-*



*cundum Consuetudines Regni approbatas, & demum secundum jura, quibus Constitutiones Prædecessorum nostrorum, & nostræ non obviant.* Dic, sodes, prædecessores isti, quos generatim, ac seorsim hic appellat Federicus, num Byzantini sunt accipiendi? Nihil profecto minus. Nam quum agatur inibi de Feudis, prout scilicet Longobardica, ac Normannica ferebat disciplina, prædecessores illi sicut ad Normannos quaquaversum convenienter, ita ad Græcos referri nullo pacto possunt, apud quos nulla erat rerum feudalium constitutio. Quod argumentum, ut alia omnia desint, si ad nostram accommodabis Constitutionem, ubi de rebus feudalibus agitur, qui poteris Prædecessorum nomen ullo modo ad Byzantinos referre? Nec quia Federicus Normannos ibi reticuit, propterea exclusisse censetur. Solet enim in narrationibus usuvenire, ut id non repetatur, quod facile ab omnibus subesse intelligitur; quum frigidum putetur, illa inculcare, quæ omnium opinione præsumuntur. Quod sane Federico accidisse minime dubito, qui ea in re dubitationem omnem defore, jure poterat existimare.

Et quidem Federici rebus minime conducebat, tantopere jura & leges Græcorum extollere, ut ab illis suam repeteret Constitutionem. Græci enim Imperatores ægre admodum ferebant, harum ditionum  
qua-

qualemcumque amisisse possessionem : nec nisi uti invasores , prædoneſque ſuis monumentis Græci Normannos infectabantur. Quare Federico , qui omne jus Regni a Normannis deſumebat , minus commode legibus Græcorum uti convenerat , a quibus jure meritoque amiſſum Regnum tueri debebat . Eumdemque propterea nihil quidquam in actis ſuis ad Græcas Conſtitutiones retuliſſe legimus : qui in univerſa , quam edidit , juris forma , conſtanter ſemper edixit , res prorsus decernendas legibus primo loco noſtrarum Conſtitutionum , quæ peculiareſ erant Regni Siciliae , ſecundo loco ex Conſuetudinibus ; hiſque ambabus deficientibus , poſtremo loco judicandum ex legibus Longobardorum , & Romanorum .

Quid vero dicam de *Reſponſione* illa *Imperiali* ad Gregorii IX poſtulata ? Ibi enim ita explicate , ita diſertis verbis , eam Regni Sicilienſis propriam fuiſſe Conſtitutionem enunciatur , ut citius Herculi clavam extorſeris , quam eorum verborum ſententiam alio tranſtuleris . Hæc vero omnia , quæ ſatis firma , quippe ex certis monumentis , atque ex ipſius rei viſceribus deſumpta videri debent , poſtquam confirmata reperiebantur genuino , ut mox oſtendemus , ac veriſſimo Manfredi diplomate , ea nullam amplius cuiquam dubitandi anſam præbere exiſtimabamus . Atque hæc prorsus fuit noſtræ inter-

terpretationis ratio . Quæ quidem tunc temporis minus enucleate sunt a nobis disputata , utpote quæ omni caritura difficultate videbantur : quemadmodum nimirum, quin ea ipsa adhuc vim omnem suam retineant, minime dubito.

Nam quæ a te prolata sunt argumenta, ut ad ea tandem dicamus , non satis perspicio, quo pacto possint nostro illi iudicio fidem derogare . Quocirca quanquam ex his , quæ hætenus enarravimus , satis nos rem confecisse videri debemus; attamen non erit tibi grave, si tuis illis rationibus quantum sit ponderis tribuendum, paulisper perquiramus . Ac primum illud tuum , minus nempe verisimile & congruens videri, Normannos ejus Constitutionis, ab Ecclesiæ rationibus alienæ, auctores inducere , quos in Ecclesiam munificos admodum extitisse constat; hoc quidem parum , vel potius nihil habet firmitatis . Non inficior equidem, Principes illos munificentissimæ benignitatis monumentis insignem pietatem suam facere studuisse; sed suæ liberalitatis modum tandem adhibuisse , eamque ab Reip. rationibus nunquam alienam fore voluisse, dubitari item non potest . Nam qui tertiam bonorum partem Ecclesiæ erogandam cum ipso Romano Pontifice constituerant, idque satis ad Religionis cultum futurum putaverant; pronum inde sit judicare, eosdem ob id ipsum privatorum largitiones nova ea Constitutio-

tione, sine ulla sacrilegii, aut perjurii religione, inhibendas voluisse. Verendum enim ipsis erat, ne, si Clerici nullis limitibus circumscriptam possessiones acquirendi haberent facultatem, post tertiam partem, aliis quoque partibus manus admoventes, paulatim quidquid erat privatorum occuparent: quod Reip. minime expedire arbitrabantur. Neque id non vidit Federicus Imper., qui in hanc prorsus sententiam in sua *Imperiali Responsione* sese ad Gregorii IX. expostulationes purgavit: inquit enim: *Et hoc propterea fuit ab antiquo statutum, quia si libere eis, & perpetuo burgasatica liceret emere, sive accipere, modico tempore totum Regnum Siciliae (quod inter regiones mundi sibi habilius reputarent) emerent, & acquirerent.* Quod quidem illis temporibus evenire non erat difficile, quibus vulgo mortales opinabantur, eo uberiores a Deo accepturos se peccatorum expiationem, quo effusiones fuissent in dilargiendis bonis suis Ecclesiis. Idque eo molestius ferebant Principes, propterea quod nimium excrevisse immunitates illas tributorum, & soli querebantur, quibus tunc temporis utebantur Ecclesiæ: quarum exemptionum obtentu, dum *servitia*, & publica onera Clerici detrectabant, iis præfidiis spoliabant Remp., sine quibus ipsa stare non posset. De quo per id ferme temporis tanta invaluerat opinio, ut Gratianus sæculo ineunte XII non

non dubitaverit juri divino ipſas immunitates aſſerere . Hoc igitur ne malo publico accideret , providendum curarunt Rogerius , ac deinceps alii . Minime tamen Eccleſias largitionibus , ac liberalitate privatorum defraudarunt , nec piis Chriſtianorum voluntatibus obſistere . Illud dumtaxat unum caverunt , ne nova Eccleſiæ prædia adipiſcerentur : eorum autem pretium utique retinere ſiverunt . Id autem ab eorum eximia religione & pietate abhorrens exiſtimari non poteſt . Nam , ut eadem prorsus de re edixit Federicus II Aragonius , Siciliae Rex , *Re minime carere videntur Eccleſiæ , quum ſuccedit pretium loco rei ; Capit. Regni Siciliae lib. II cap. XXIII.* ubi agitur *De reddendis infra annum rebus translatis in Eccleſiam .*

Normanni nimirum eam Regni conſtitutionem paraverant , ut ſicut homines , ita & res non unius eſſent conditionis . Nam Feuda quædam majora , ſive Capitanea dicta , quædam minora ; bona alia itidem allodialia quædam , alia burgatica ; eiſque varia onerum genera , prout uſus Reipublicæ poſtulabat , impoſita . Ex Feudis ſcilicet onus certum , appellatum *certum ſervitium Curiae* , debebatur : *non certum* vero , ſive extra ordinem ex aliis poſſeſſionibus . Homines pariter ſicut in varias claſſes tributæ , variamque fortiti conditionem ; ita non unam eandemque habuere acquirendi facultatem . Siquidem Feuda certo civium

or.

ordini fuerunt adscripta ; a quibus omnes alii arcebantur. Neque ea omnia indiscriminatim ad quoslibet pervenire poterant : sed quotiescumque unamquamque rerum earum ex alio in alium traduci , alienarive contingeret , nunquam id , tam a concedente , quam ab accipiente , fieri permissum , sine Principis auctoritate . Ceterorum autem bonorum , ex quibus scilicet *certum* illud *servitium* Curia minime debebatur , liberam sivere apud liberos homines acquirendi facultatem . In tanto rerum , & bonorum delectu atque discrimine , inque ea Reipublicæ administrandæ forma , quid mirum , si quidam civium ordines a quibusdam facultatibus comparandis arcerentur ? Suas profecto rationes Principes illos in earum rerum procuratione habuisse , ex stimandum est , quæ cuiquam iniquæ videri non debent . Propterea si Ecclesias a novis possessionibus acquirendis prohibuerunt , vitio eis verti nullo pacto potest . Latet fortasse nobis , quodnam eorum fuerit prorsus consilium , quæ mens in hac decernenda Constitutione . Licet nihilominus existimare , respexisse eos ad tertiam illam bonorum partem Ecclesiæ tributam ; qua una Clerici forent contenti , neve quid præterea de reliquis duabus partibus attingerent , cautum . Fortasse etiam spectarunt ad sacri Ordinis conditionem : Clerici enim dum contemplationi , & precibus , prout eorum vitæ ratio postulat , vacant , agrorum culturam ea ,  
qua

qua par est, diligentia exercere non possunt. Adde denique, si lubet, habuisse illos rationem immunitatum Clericorum, quarum gratia aliquid de Ærarii rationibus diminui vererentur. Quidquid horum, sive aliquid aliud, velis, certe neque improbanda, neque spernenda eorum Principum ratio atque consilium videtur, si, quo minus Ecclesiæ novas bonorum possessiones acquirerent, prohibentes, pretium tantum eas accipere, possessiones autem ipsas aliis, qui idonei haberentur, tradere jusserunt.

Atque ea prorsus de re factum arbitror, ut universa nostrorum Longobardorum diplomata, quibus bonorum possessio Ecclesiis tribuitur, illorum Principum auctoritate confirmata inveniantur. Apud Ughellium, Gattolam, Muratorium, aliosque tot ejus generis occurrunt monumenta, ut ea referre, nec vacet, nec necessarium putem. Sed hic quidem locus concludi jam potest. Nam, si quæ a privatis civibus fiebant donationes, uno tenore firmatas invenimus ab illius ætatis Principibus, ut ita nempe suorum bonorum Ecclesiæ rite fruerentur possessione; id satis argumenti esse potest, sine ea Principali auctoritate irritam fuisse possessionem eandem. Quod quidem tunc temporis quum universe apud omnes fere usuvenisse constet, idem jus si Normanni tenuerunt, nihil de eorum religione & pietate detractum videri debet.

Ca-

Cave autem ( bona hoc tua venia dixerim ) ne forte duos confundas Rogerios , Comitem patrem , & filium Regem . Nam is , a quo Urbanus Romanus Pontifex petierat , ut post ereptum Saracenis Siciliæ dominatum , tertiam bonorum partem *Extruendis Ecclesiis , Monasteriis , Hospitalibus , Abbatiis , & Prælatiis , ad honorem cultumque divinum* exhiberet , Rogerius fuit Comes : qui autem Constitutionem tulisse perhibetur , Rogerius Rex est , Rogerii Comitis filius .

Nihilo tamen minus haud scio , an omnium Normannorum Principum ea fuerit regiminis ratio , ut nihil de bonis immobilibus sacrum fieret sine Principis auctoritate . Nam & de ipso Rogerio Comite comperimus , tribuisse eundem Ecclesiæ D. Michaelis Archangeli Trainensis bona acquirendi facultatem . En diplomatæ verba , quæ apud Pyrrhum Sicil. Sac. tom. II fol. 1016 , sic efferuntur : *Si quis vera fidelium , amore Dei , & salute ejus animæ compunctus , eidem Ecclesiæ ex suo jure dare aliquid voluerit , vel Ecclesias , possessiones , vineas , terras , domos , villicos , stet in eorum libertate .* Dum igitur donandi dat potestatem , aliquid fuisse dicendum est , quod donationes ipsas vetaret . Atque inde si Rogerium Regem Constitutionem suam jubendi causam sumpsisse affirmarem , quæ nimirum perpetua esset , & generalis Regni lex , minus a vero aberr-



errare videor . Non enim defunt ejus Rogerii monumenta , ex quibus ipsum legis fuisse auctorem plane licet colligere . In eis enim , quamquam ipsissima Constitutionis verba non exhibentur , formam tamen ipsam , & sententiam videre est . Sic Rogerius Rex anno MCXLVIII potestatem facit D. Joannis Eremitarum Monasterio eos omnes suscipiendi , quibus eo conferri libuisset : daturque insuper venia eosdem recipiendi cum omnibus possessionibus suis , quas scilicet possessiones utique retineret Monasterium , nulla impediende Potestate . Ex quo intelligi debet , aliquod antea fuisse impedimentum , cujus gratia Monasterio , sicuti & Ecclesiis , minime liceret , sine Principis permisso , accipere facultates privatorum . Quod sane de bonis , quæ liberi essent commercii , intelligendum est : nam bona illa , de quibus scilicet certum Curiaë servitium pendere debebat , sicuti nec illis accipere , ita nec his donare fas erat , inconsulto Principe . *Liceat Abbati Clericos , & Laicos cum rebus , & possessionibus suis , sine alicujus personæ contradictione , recipere , & sine alicujus molestia retinere , exceptis Feudis , & possessionibus , quæ sunt alicui servitio obligatæ , quæ nec ipsi recipere , nec illi offerre , absque nostra , nostrorumque heredum licentia , presumant.* Apud Pyrrhum Sicil. Sac. t.II fol.iiii §.XII Quis, amabo, his in verbis non perspiciat ,

B

non

non dicam adumbratum , sed penitus ferme expressum Normannicæ Constitutionis contextum ? Cum qua, quæ a Federico postmodum lata est Constitutio, mire consentire, quis sanus dubitabit ? In utraque enim , quæ bona libera forent, quæque certo servitio, ac vectigali haberentur addicta , designantur: idemque prorsus ambæ , tam acquirendi, quam retinendi præferunt interdictum . Similia aliorum diplomatum recitari hic possent verba : quæ quia facile consuli possunt apud Pyrrhum in sua Sicilia Sacra , omittenda puto .

Guilelmi potius Regis , qui secundum Rogerium regnavit , nonnulla prodamus monumenta . Is itaque privilegium traditurus Ecclesiæ D. Mariæ de Bordonaro , sic ait: *Ego prædictus Rex Guilelmus . . . Venisti coram nobis tu Rogerius de Secretis . . . ut confirmaremus præsens privilegium , seu sigillum , quod sponte obtulisti Deo pro remedio animæ vestræ . . . infra scriptis Monasteriis.* Ap. Pyrr. ib. fol. 1009. Quid, quæso, verba isthæc sibi volunt ? Illud enimvero, sine Regis assensu non licuisse Ecclesiæ illi nec acquirere , nec possidere . Ejusdemque Guilelmi legimus D. Michaeli Archangelo Trainæ tributum privilegium , quo Monasterium illud de Burgensibus , & Colonis comparare possessiones posset . *Præterea concedimus licentiam prædicto S. Monasterio , si facultas est , possessiones libera , & sine molestia emere*

*re a Burgensibus , & Colonis : & si quis voluerit fieri Monachus , sine omni impedimento , cum omnibus suis rebus recipiatur ab Abbate pro tempore .* Ib. fol. 1017. Nolo in ejusmodi enumerandis testimoniis multus tibi videri , utpote in re minime dubia . Verum his in monumentis quemlibet perspicere arbitror formam Constitutionis , quæ apud Normannos universe servata est , utrumque ab eisdem disertis omnino verbis usquam indicatam non legimus : cujus Constitutionis vi , facta rerum partitione , prohibitum fuerat , ne Ecclesiæ quidquam de bonis stabilibus acquirerent , nec retinerent , antequam a Principe impetrassent privilegium . Quæ quidem si cum verbis illis tuis conferas : *Ante Federicum ea de re Constitutionem in Regno Siciliarum nunquam fuisse latam , confidenter asserimus ;* illud profecto a te nimium festinanter dictum , fatearis oportet . Nam , nisi pertinaces admodum esse velimus , in toto Normannorum Principum regimine , ad Guilelmum II usque , eam legem cum primis viguisse , inficiari non possumus : quam in sua illa pupillari ætate , & rerum perturbatione , irritam quodammodo factam , questus deinde est ipse Federicus .

At nusquam , inquires , nobis apparuit hactenus veteris illius Rogerianæ Constitutionis integrum exemplum . Quasi ad nos vetera monumenta & publica , & privata pervenerint omnia . Atque id ipsum a Federi-

co præsertim indicatum videmus. Ipso enim suæ Constitutionis exordio queritur, veterum illam prædecessorum suorum legem, oburbationem præteriti temporis fuisse antiquatam, eamque propterea ab se nova jussione instauratam. Quod adeo compertum, ut eam ipsam veterum legem ab se fuisse confirmatam Federicus ipse alibi affirmet. Concessurus enim Monasterio Montis Virginis facultatem comparandi, ac possidendi bona stabilia, ait: *Et ea nunc ipsi Monasterio ab omni servitio Curiae nostræ debito perpetuo liberamus . . . . Non obstante Constitutione aliqua prædictis omnibus oblationibus, & donationibus contraria, a majestate nostra edita, seu CONFIRMATA, quod bona stabilia Ecclesiis, & religiosis locis oblata vendi, & alienari debeant infra annum . . . . Datum Fogiæ an. MCCXLI.* Extat ejus diplomatis exemplum in Tabulario ejusdem Monasterii Montis Virginis vol. VIII, fol. 77. Quod si Federicus confirmavit, eam nimirum Constitutionem confirmasse existimandum est, quæ lata jam in eodem Regno, non aliunde petita fuerat: neque enim aliter propria verborum vis & significatio constare poterit. Manet igitur illud, quod volumus. Quoniam ea Constitutionis forma Normanni usi sunt, qua profecto usos fuisse, veterum monumenta nos addubitare non sinunt; quid necesse habemus, ad Græcos potius, quam ad Normannos Reges Constitutionis illius prædecessores referre?

At

At Byzantinos Imperatores luculentas ea de re leges tulisse, eisdemque ætate Federico prævisse, constat. Quid ni? Id ipsum ego non dissimulanter enarravi in Adnotationibus, non unis locis allatis ex Jure Græco-Romanorum de Leunclavii interpretatione, & ex epistola Innocentii III, Rom. Pont. Verum ad illos potius Federicum respexisse, quam ad Reges nostros, illud vero est, quod concedere non possumus. Quin si eas ipsas Græcorum leges propius inspiciamus, inde sane non leve fortasse argumentum desumpserimus, quod vel maxime sententiam nostram confirmet. Non inficior equidem inter Constitutionem Federici, & Græcorum hoc prorsus convenire, ut sacris locis nova bonorum possessio interdicator; idque dumtaxat eis relinquatur, ut justum æstimationis pretium, non possessionem ipsam accipiant. Attamen quod Græci promiscue, & generatim, nec ullo temporis termino definito, jussere; Federicus magis circumscripse, & peculiari sibi ratione edixit, ut nempe, quæ Sacra Domus *institutionem, vel legatum acceperit, teneatur infra annum alicui de proximis defuncti, vel de burgensibus nostris relictis stabilia vendere*. Quod quum proprium sit, & præcipuum tum Siculæ, sive Rogerianæ, tum Federicianæ Constitutionis, nusquam autem id legatur in Græca; satis ex eo debet intelligi, nunquam Federicum ad Byzantinos Imp. rem detulisse: sed dum Præ-

decessorum suorum veterum Principum Constitutionem confirmare profitetur, illud sane ostendit, eam propriam fuisse Siciliæ, inque eodem illo Regno latam legem. Quod quidem luculentissimis deinde verbis significavit in sua *Imperiali Responsione*, in qua non semel, atque iterum eam vocat *antiquam Constitutionem Regni Siciliæ*; sed addit insuper: *Et hoc propterea fuit ab antiquo statutum, quia &c.* Quid, quæso, fuerat statutum? Illud enimvero, quod indicaverat; nempe *quod nihil potest eis, sine consensu Principis, de burgensaticis inter vivos concedi, vel in ultima voluntate legari; quin post annum, mensem, septimanam, & diem aliis burgensibus secularibus vendere, & concedere teneantur.* Dum itaque ad istiusmodi exempli legem suam Federicus refert Constitutionem, quoniam nullam ejus formæ apud Græcos invenire est Constitutionem; quis non videt, eam sic ad Siciliæ Regni Principes pertinere, ut nullos alios Federicus, præter eos, prædecessores intellexerit?

Nam quod contendis, ibi pro *antiquæ Constitutionis*, legendum *antea datæ Constitutionis*, cumque iteratum fuisse mendam amanuensium, arbitraris; quam parum feliciter eam emendationem suscepis, pluribus ostendere non est necesse, quum cuivis nullo negotio id pateat.

At ipsemet Federicus ait: *Et hæc eadem Constitutio obinet ultra mare.* Quasi ob-

scu-

fcurum sit, quorsum verba illa Federici pertineant. Nam, ut ex ipsa nativa verborum vi, & contextu orationis plane colligitur, id unum Federicus voluit, non esse, cur ea Constitutio ut in Ecclesiam injuriosa traducatur, quum par Constitutio jam pridem ultra mare, hoc est, in Græcorum Imperio obtineat: ut, si in nobilissimis Catholicæ Ecclesiæ regionibus lata ea lex fuerit, cur ab se ferri suo in Regno non potuerit? Quod si ad hanc sententiam rem traducere placuerit, ad exemplum nempe, sicuti ceterorum Principum, ita & Græcorum, suam Federicum edidisse Constitutionem; in eo sane tibi non refragor: modo stet illud, formam suæ Constitutionis Federicum non a Græcis, sed a Siculis Normannis Regibus revocasse.

Quid si, quo tempore eas Constitutiones Græci Imp. tulere, nullam Siciliæ habebant possessionem? Satis enim ex veteribus annalibus constare arbitror, Saracenos, pulsos Græcis, Siciliam occupasse jam inde ab seculo VIII; nec, nisi advenientibus Normannis, hoc est, labente jam seculo XI, dejectos eos ex diutina Siciliæ possessione. Atqui primus, quem apud Græcos eam legem sanxisse legimus, fuit Imperator Romanus, cujus Constitutioni annus adscribitur DCCCCXXVIII. Quoniam igitur Græci suarum ejusmodi legum tempore nullum apud Siculos principatum habebant, inde plane apparet, eosdem a Fede-

rico prædecesores suos dici minime debuiffe, qui leges illas suas in Sicilia, quam non regebant, promulgare non poterant.

Venio nunc ad Manfredi Regis diploma: quod quidem hujus disputationis causa est & fundamentum; quodque, ut supra etiam ostendimus, omnem de medio tollit difficultatem. Ibi siquidem non obsecuris, sed luculentissimis prorsus verbis demonstratur, non alios omnino prædecesores illos fore intelligendos, quam Rogerium, & Guilelmum Reges. Manfredus enim, postquam Domui Hospitalis Theutonicorum bona acquirendi, & possidendi facit potestatem, addit: *Non obstante Constitutione Divorum Proavorum nostrorum Regum Rogerii, & Guilelmi, confirmata postmodum per quondam prædictum Dominum Patrem, & Fratrem nostros felicitis memoriæ, & nostris etiam Constitutionibus comprehensa, per quam mandatur expressius, ut possessiones omnes, & bona stabilia sacris locis, & ipsorum Prælati a quibuslibet patronis oblata, ultra annum retinere non debeant, sed distrahantur omnimodo, ipsorum pretium ad utilitatem Ecclesiæ, cui oblata fuerint, convertendo.* Datum hoc diploma fuit Panormi ad annum MCCLXII, trigesimo omnino vertente anno, postquam Federicus suam ediderat Constitutionem. At Manfredus, qui ita paternis documentis fuerat institutus, *ut mens, & manus Federici* ab illius ætatis Anonymo



mo appellaretur, dignus habitus est, cui, patre vita excedente, summa rerum tuenda traderetur, ac generalis Regni *Balius* a Federico constitueretur. Qua in potestate tantam præsetulit solertiam, ut, quemadmodum monumenta testantur, novo in regimine nulla *interruptio visa fuerit facta paternæ felicitatis & pacis: sed continuato dominio patris ad filium, idem videbatur esse regimen Principis, quod fuerat Imperatoris*. Hic igitur paternarum rerum & Constitutionum ignarus non modo existimandus non est, sed potius optimus testis, & explanator habendus. Atqui hic ille est Manfredus, qui Federici Constitutionem interpretatus, ejus primævæ Constitutionis auctores fuisse Rogerium, & Guilelmum enarrat. Quod monumentum tanti apud nos tunc ponderis fuit, ut nullum amplius dubitandi locum nobis relinqueret: eademque in sententia cur nihilominus nunc perseveremus, quidnam hætenus esset, non videmus.

His omnibus adde, Manfredum eo in diplomate conficiendo opera usum fuisse Gualterii de Odra Regni Cancellarii; at cujus viri! Fuit nimirum Gualterius apud Federicum magno in honore habitus, cujus in Aula versatus plurimum erat. Adfuit collectioni Constitutionum. Fuit amicus, & in rebus gerendis comes Petri de Vineis, qui eas Constitutiones in unum corpus digessit. Fuit quoque ab ipso Federico adhi-

hbitus in illustri legatione ad Britanniae Regem anno MCCXLII. Anno postmodum MCCXLV missus ad Concilium Lugdunense una cum Thaddæo de Sueffa, & Petro de Vineis. Eundem Archiepiscopum Campanum designatum invenimus. Quid multa? Ita quoque te verteris, Gualterium intueris virum doctum, perspectæque fidei, ac tandem perfunctum rebus amplissimis, summum dignitatis gradum tenuisse apud Manfredum Regem: facile ut quivis intelligat, ei non modo nullam ignorantiae notam inurendam, sed maximam potius fidem adhibendam, utque testem locupletissimum habendum: quippe æqualis temporum illorum, & qui forte eisdem quoque Constitutionibus describendis aliquando manum admoverit: ab ipso certe Petro de Vineis rem omnem verissime potuit accipere. Qui proinde si Constitutionis auctores vocat Rogerium, & Guilelmum, id perinde desumendum, ac si ab ipso Federico res tradita nobis esset.

Quare mihi facile in animum induco, quæ tua est maxima rerum cognitio, faniusque iudicium, te probe intelligere, quanta huiusce argumenti vis sit, & pondus. Nihilominus quia ad maxima quæque, & sublimiora contendere videris, aliquid aliud, quod augustius esset, ejus in Constitutionis origine excogitare malle. Placuit igitur tibi, verbo tenus suspecti, incertæque fidei postulare hoc ipsum Diploma. Sed quæ-

quæso, mi Vari, omittamus tantopere istam diplomatum falsitatem inculcare. Satis jam satis rixarum & contentionum nostra ætas vidit: satis turbarum nimia nonnullorum in dubium omnia revocandi libido excitavit. Nullum propemodum vetus diploma in lucem prolatum est, quod non sit falsi suspectique postulatum. Quid ita? Quia decertantibus partibus, dum alter commoda & rationes suas tuctur, alter appugnat. Quo fit, ut nunquam desint, qui, nodum in scirpo quærentes, quasvis falsitatis notas singulis in veterum chartis non deprehendant, non sine cordatorum hominum stomacho. Sed quænam tanta ista intemperies, monumenta tot, tot res vetustate robustas calumniando velle pervertere? Hos, inquam, missos faciamus, rogo: quandoquidem nihil adeo apud doctos jam risu dignum videtur, quam locis illis communibus uti: quod perditæ, & iniquæ causæ certissimum indicium nonnullus poterit existimare.

Attamen, ut omnem ex animo tibi scrupulum evellamus, neve ad putidam illam disputandi rationem forte devenias, accipe paucis quidquid ea de re dici unquam, aut excogitari poterit. Nego eo in diplomate quidquam reperiri, quod minus rerum a Mansfredo gestarum ordini, temporibus, antecedentibus, consequentibus, cunctis denique, quæ, etiam de cujuscvis morosi critici sententia, ad illius veritatem confirmandam pertinent, conveniat,

niat, aut quid falsi redolere videatur. Et quidem si diploma istud ab ullo unquam confectum credatur, id profecto neutiquam evenisse, nisi post Manfredi tempora, quin & post ipsam Aragonensium primam stirpem, oportuit. Manfredus enim, & Jacobus, nec non ipse Federicus Rex, qui eam Imperialem Constitutionem, cuncta consentiente natione, instauravit, utique suppositionem, si qua unquam fuisset, pernoscere poterant; neque adeo peculiariter idem privilegium cuiquam dilargiti fuissent. Ergo conflatum diploma videri posset post XIV seculum. At nulla tunc mendacio merces, quum prolapsa disciplina prorsus ceciderat. Ex eo quippe tempore opinari vulgo sic cœperant, quoniam rerum pretium ab Ecclesiis auferri nullo modo poterat, parum interesse, ipsarum rerum eisdem tribuere possessionem. Denique quidquid conjectari libuerit, scito idem Manfredi diploma a duobus fuisse exscriptum Notariis, anno scilicet MCCLXII, ac proxime insequenti, eaque exempla asservari in membranarum Tabularii Domus Mansionis, ut narrat Mongitorius in Monumentis historicis ejusdem Sacræ Domus Mansionis. Quid plura? Vereor enim, ne nos nimis multa de re apertissima.

Id unum postremo loco addamus, paulisper finito. Neque enim existimes velim, nos uno Manfredi diplomate niti, quasi solus fuerit Manfredus, qui præde-

ces-

cessores Federici nobis declaraverit. Sunt & alii Principes, qui a Mansfredo minime discreparunt. Nam XXXV non amplius annis post Federici Imp. obitum, Jacobus Rex ut prædecessores, auctoresque Constitutionis agnovit Rogerium, & Guilelmum. Id quod diserte indicavit in eo diplomate, in quo Theutonicorum privilegia, resque, quas possidebant, confirmans, addit: *Non obstante Constitutione Divorum Proavorum nostrorum Regum Rogerii, & Guilelmi, confirmata postmodum per quondam Serenissimum Imp. Federicum proavum nostrum felicitis memoriæ, & etiam ipsius Domini Avi nostri Constitutionibus comprehensa, per quam mandabatur expressius, ut possessiones omnes, & bona stabilia sacris locis, & ipsorum Prælati, a quibuslibet personis oblata ultra annum unum retineri non debeant, sed distrabantur omnimodo, ipsorum pretium ad utilitatem Ecclesiæ, cui oblata fuerint, convertendo, &c.* Datum Panormi MCCLXXXV, XXII. Febr. Quod diploma in alio Regis Federici diplomate descriptum legimus, apud Mongitorium loco modo indicato. Atque hic licet animadvertere, tantum per id temporis tributum Mansfredo, ut ipsi quoque Regni Constitutiones adscriberentur: idque ea forte de causa factum arbitror, quod Federico proxime quum successisset, earum Constitutionum auctoritatem imperio suo firmaverit. Sed ad rem redeamus.

Fe-

Federicus Rex, qui paucis omnino annis post fratrem suum Regnum accepit, ad annum scilicet MCCXCIX eadem privilegia suo diplomate confirmavit, ibique integrum Jacobi Regis, qui proxime regnaverat, diploma transcribitur: ut facile quivis possit intelligere, diploma illud ut germanum ab eo habitum, ac legitimum.

Petrus II Rex, anno MCCCXXXIV., Federici II diploma comprobavit, in quo descriptum, ut diximus, legebatur Jacobi Regis diploma.

Similia legimus de ceteris Regibus, de Ludovico scilicet, qui, quod Petrus Rex ediderat diploma, confirmans, suo adjecit: De Martino, qui anno MCCCXGII eadem privilegia Domus Mansionis, præcipueque diploma, quod dederat Jacobus Rex, confirmavit, inque suo inseruit diploma Ludovici Regis: De Rege Joanne, qui ad ann. MCCCCLXIV cuncta ea privilegia rata habuit, ac præ ceteris Federici, & Jacobi diploma complexus est: Ac tandem de Ferdinando Rege Catholico, a quo & privilegia ejus Domus Mansionis confirmata sunt, & suis in litteris diploma Regis Joannis, quod pariter diploma Regum Federici, & Jacobi complectebatur, comprobatum. Quæ singula perscripta invenies apud eundem Mongitorium ex tabulis ipsismet Ecclesiæ Mansionis, & ex publicis Regni Tabulariis.

31  
riis . Atque hæc omnia privilegia , ac diplomata tantam vim apud justos rerum æstimatores habent , ut quidquam falsi , aut commentitii in Manfredi Regis diplomate excogitari a quoquam non facile patiantur : sunt enim ejusmodi , ut omnes in se habere numeros veritatis , minimo negotio comperias .

Hæc ad te scribenda duximus , ut quid esset , quod nos , quominus de veteri nostra sententia discederemus , prohiberet , te facerem certiore : quæ etsi singula te hominem doctum movere possunt , universa certe quemvis vel pertinacissimum movere debebunt .

Hui ! inquires . Tam multa de re præsertim haud magni momenti ? Fateor equidem , me longius progressum , quam initio constitueram . Sed nosti scriptionis rationem . Dum aliud feritur ex alio , hanc demum exaravi pluribus verbis epistolam . Quanquam his de rebus tecum , viro nostrarum antiquitatum peritissimo , litteris colloqui , mihi fuit admodum jucundum : ut , si a te æque verbosiores eliciam epistolam , majorem , si fieri potest , nostræ controversiæ accessuram lucem existimem . Sic enim arbitror , minime , quod nostra nonnihil refert , opus esse aliunde ascitam comminisci Constitutionem , quum nostra prorsus ea fuerit lex , orta scilicet cum ipso Regno , quippe ab ipso Regni conditore Rogerio promulgata , inque primis Regni insti-

32  
stitutis inserta, atque ab insequentibus de-  
inceps Normannicæ stirpis Principibus apud  
nos, apud Siculos autem diuturniori Re-  
gum serie usurpata. Vale XVII Kal. Maj.  
an, MDCCLXXIV.

VA1 1521068